

Körnlibank 2022



Körnlibank 2022

Rückblick auf unsere digitale Fasnacht 2021

I ha s letscht Johr üsi Fasnacht wella luaga im Internet

has aber nöd gfunda und bi drum halt früh is Bett.

Vu luter Youtube, Liken und Streamen im Plug-In

isch mir da Compi abgestürzt, i glob i spinn.

I bi halt mit dem neue Zügs nöd aso versiert

und min alta Göppel isch drum grad explodiert.

Und obwohls bi euch do inna grüsig stinkt - er send jo scho ganz bleich

ischt da immer no besser als da letztjöhrig elektronisch Seich.

Tschüss geliebta Räbstock

Da Räbstock isch ufgeh wora, mer könd da nöd ganz verstoh'
dia Liegenschaft wörd immer älter und am Zerfall überloo
Nöchst Wucha tönds drum sogär vom Kanton uf Räbschta abi cho
da Rebstock wörd unter Heimatschutz gestellt und d Wirtin Zita grad o.

Energiestadt Rebstein ohne Mut

Mer Obervögel übernehmid bald d Energiestadt-Jury,
weil üsi Gmeind hät dafür kei grosses Gspüri.
Energie- und Kosta-Spara wär eigentli so banal,
wänn ma i da Nacht au abstella würed üsers Licht-Signal.
Doch einfachi Rezept gönd bi üs nöd guat
wills dänn da Rotsmanna und -frau wohl sofort ablöscha tuat.

Das war nicht sehr geschickt

Da Hampi Graf und sini Hilde,
er da Express und sie die Wilde,
sind trotz Lockdown uf Hohenems go poste,
im Lade hett mers am liebsta verschosse.
D Verkäuferin sait: Verschwindid, er bringid üs nu dä koga Virus
und drum isch mit am billig-likauft sofort Schluss.
Sie hönd Angst überko und sind über d Grenza wia da Blitz
uf Schlichwägli vorbi am offiziella Zoll i d Schwiiz
Und i ha mir so dänkt: Grafs för 10 Täg bi da Groschli i Quarantäna
also i hett sicher nöd vergossa grossi Träna.

Rebsteins neustes Bauwerk

Räbschta läbt und üsas Dorf isch aktiv
zeitgemäss, modern und innovativ
Üsi Bedürfnis wörid ufgnoh und mir sind hocheufreut
nu da Gemeindrot hät a Bauwerk a kli bereut.
Doch mir freuid üs mit allne Räbschter Fraue und Manna
uf üsars neu Freibad; zum minsta afang uf dia fuf wiessa Badwanna.

Wir haben ein schlechtes Gewissen

D Schwiiz hätt im Frühling d Burka-Initiative agnoh
und einige Lüt könnid da bis hüt no nöd verstoh'
Au mer Obervögel hönd a schlechts Gwüssa und biichtid zu Gott
will d Kücken-Maska goht sicher auch scho unters Verhülligsverbot.

Verwechslungen wären fatal

A da letzta Fasnacht hönd mer eu über üsi grossa Bauta informiert
und dass da Otto-Peter Graf all dia Projekt als Planer realisiert.
I hoff, dass er kein Bauprojekt tuat verwechsle und versaua
und s Sterbezimmer vum Geserhus is Schulhus Schacha tuat baua.

Gendergerecht

«Liebi Fründ und Fründinna vu da Obervögel und Obervögelinna
mer heissid Sie willkomma, liebi Fasnachts-Narra und Fasnachts-Närrinna»
Nach Duden isch da jetzt dia korrekti Anrede gsi, i komm zum spinna,
und bim Schriebe häts glob no a Sternli oder an Schräg-Strich zwünschat inna.
Also dia neu Gendersproch isch schwer und gär nünt för mi
aber d Begrüssig „Liebi Obervögelnde“ wär sicher au verkehrt gsi.

Ex Tschutter mit Heizproblem

D Heizig vom Guido Keel, Blumenstrasse isch defekt
und er bietet an Techniker uf, da isch perfekt.

Da Spezialist ortat schnell s Heiz-Problem
und jetzt wörs för da Guido a chli unbequem:
„Guido, dini Heizig isch nöd kaputt - Gott sei Dank
aber du häsch halt eifach kein Heizöl mehr im Tank“.

Frauenpower in der Gehirn-Agentur

D Primarschulrot isch wiblich, da isch Fakt
d Gleichstellig isch scho lang nümme intakt.
Und grad drü Fraua sind au no in Schulrat inacho
drum sind au scho dia erste Lämpa doo.
Da bringt dia Manna nämli bös ins Schwitza
denn ab sofort wörd gseicht nu no im Sitza.

Neuer Mittagstisch

I tua kocha för da neu Schüler-Mittagstisch
mis Essa isch kindergerecht, gsund und ganz frisch
Mer hönd scho Anmeldige übercho, doch eini isch zum vergessa
do wett doch tatsächlich da Zelt-Mäk wieder amol warm go essa.

Golfwägeli sind zum Golfen da

Dia beida Jungtschutter Nico D. und Kumpel Eisenhut
hönd i da Ferie Durscht, Energie und Mut
Sie fahrid mit ama Golfwägeli umanand, natürlich illegal
am Morga am drü, bsoffa, doch da isch dänna scheissegal

Doch sie sind schnell wieder nüechtern wäg däm Seich
wos s mit am Golfwägeli fahrid in an tüüfa, kalta Teich.

Und dia Moral vu dära wahren Gschicht'
dia beide Tschutter sind glob nöd ganz dicht.

Nur Rebstein hat keinen

Rheineck hät eina und Altstätta au
Balgach häts und sogar Diepoldsau
vieli Gmeinda im Tal hönd eina
doch nu mer Räbschter hönd keina.
„Ischas echt wäg da Corona-Verschwörer gsi“
han i dänkt - gemein wia i halt mängmol bi
I bi drum verruckt und ganz truurig,
will i vermiss üsara Weihnachtsmarkt ganz schuurig.

Bienenzüchter Hochburg Rebstein

Da Ivo Keel häts Bienäzüchta z Rübsta erfunda,
mit sine Völker verbringt er mängs Stunde
Doch lut amana Ziitigsbericht und zwor a ganzi Siita,
hätt de Ivo neu Konkurrenz uf da Rübster-Berg-Siita.
An Jungimker namens Gmeiner wörd im Rhintaler porträtiert
und d Ziitig schriibt, er machi sis Hobby sehr ambitioniert.
Da Ivo nimmts zur Kenntnis, ganz entspannt
Isch er doch z Räbschta als Biene-Züchter-König bekannt
Mör Obervögel verewiged ihn drum i üsi Körnlibank,
denn das isch dia einig Ziitig, wo mer erfahrt vom Dorf an Dank.

Velofahrt des Gemeindepräsidenten

An Flick-Flack, a Drüfach-Schruuba und an Salto gebückt
guati Stilnota hät er übercho, da Schlussteil isch aber nöd ganz glücklich
Glandat isch er leider nöd uf ara Turn-Matta, uf ara weicha
Nein, er isch mit am Bike gradus ini tätscht in a Eicha.
Und will er fräst wia an Hirni über Stock und Stei
isch kaputt, da Arsch, d Achsla und sis Bei.
„Jo Handörgeli, Andi E., Gmeinds-Chef und Präsident:
Häsch i da Bike-Ferie halt wieder amol kei Gfahra kennt.“

Es werde Licht an der Bergstrasse

I fahr i da Nacht uf da Bergstross uf Mohra mit mim BMW,
doch bim Elmathof blendats, i tua fascht nünt me gseh'.
A breiti Stross, 100 Lampa mit fascht 1000 Lux,
i komm nümma drus, bi aber halt scho an schlaua Fuchs
I druck kräftig ufs Gas vu minara PS-Auto-Kista
und föhl mi wia uf ara neua Flugzüglande-Pischta.

Schneefräse ausser Gefecht

Uf da Winter do hät mer sich was gönnt,
mit amerä Schneefräse hät sich dä Gmeindschriiber Urs Graber verwöhnt.
Im Summer kauft, guet versorgt - doch bim Ort sött ma halt beachta
dass ma sie bi Schneefall nöd nu vo witterem ka betrachta.
D'Schneefräse isch nämlich im Riet ussa komplett iigschneit gsii,
und do fällt au em Männerchor-Präsi einmol nünnt me ii,
Do gits nu no eis, warte bis dä Schnee isch gschmolza,
D Obervögel empfehlend: Im Summer ka mer sii villicht bruucha zum Holza.

Rebsteins neue Sozialhilfeempfänger

I bi mit minara Frau uf am Bäsa
und ha bim Bsuach grad no i da Zitig glesa
dass Räbschta soviel Sozialempfänger heg wia a grossi Stadt
und da haur da Stürfluss ufi und macht mi scho a kli platt
Drum luagid üs Obervögel a, mer sind am End, mer verdurstid schier
au mer söttid Sozialhilfe ha, einfach in Form vu zwo Bier.

Bachelor ist Kult

D Fernsehsendig Bachelor isch an Quotahit
Also s best im Fernseh wos momentan git.
Do suacht an Maa us über zwanzg Fraua eini us
Dia Sendig isch komisch, kultig aber au abstrus.
Zur Uswahl stond grad drü Wiber us Widnau
Aber dia sind weder telegen, hübsch no schlau
Und s nöchst Johr isch a Räbsterin i d Sendig, da isch jo klar
I bin grad am usfülla vu da Gmeindrötin Boehrer ihram Anmeldeformular.

Neues Rikscha-Velo im Geserhus

Dia Verantwortliche vum Geserhus hönd a super Idee
sie kaufid a Rikscha-Velo han i da Zitig gseh
Das Velo isch perfekt, as haut einigi doch grad us da Socka
so könnid d Bewohner wieder amol bequem is Dorf abi und in a Beiz ini hocka
Doch liebi Lüt: I da Fasnachtsziit tönd dänn mir euers Velo reserviera
dänn könnid mer üsa Björn endlich unfallfrei hom transportiera.

GIREMA-Gutscheine

Da Räbschter Gwerbverein hät a neu! Gutschein-Aktion lanciert
öpis kaufe - mit Gutschein zahle - i has grad us probiert.
Doch a eim Ort han i dia koga Gutschein nöd könna ilösa
und da hät mi hässig gmacht, i bi halt mängmol an Bösa.
I bi halt an speziella Ma und tua au a kli spinna,
aber könnt ma nöd s Ochsa-Puff au no als neus GIREMA-Mitglied gewinna?

Aluhüte sind modisch

Impfkampagna, Impfoffensive, Impfpflicht
I bi ehrlich und sägs eu drum fadagrad is Gsicht
Vielna Lüt isch weg am implaniterta Chip vom Bill Gates Angst und Bang
aber seit i gimpft bi, han i wäg am 2G, no viel da besser Handyempfang.

Sonntagsarbeit im Rathaus

An Sunntig noch de Kirche lauf i dia alte Landstross entlang
und gseh, do wird gschaffed a de Stäge bim Rothus-Igang.
Zerscht dank i, i gseh nöd rächt, was söll da bloss,
anderersits isch uf em Dorfplatz endlich wieder öppis los.
Jo klar, de Gmoandli hät dia Sunntigsarbet sicher befohle,
damit ihm unter de Wuche, de Beamte-Schlof nöd wird gstohle.

Wohnwagen-Verwechslung

Da Zelt-Mäk Dietsche isch da best Verkäufer im Tal
doch wa er im Summer gmacht hät, da ischt fatal.
An Maa kauft a Klinigkeit, do hät ihm da Dietsche no öpis geschänkt
und hätt doch grad no an Wohnwaga a s Auto heri gehängt.
Und will sich da Zelt-Mäck regelmässig so loot ablenka

isch da nöd doof; dä hät eifach Pech bim Denka.

Obervogelpartei OVP steht bereit

An neue Gmeindspräsident wörd gwählt im Summer
doch da macht üs Obervögel schon no a kli Kummer.
A Findigskommission wörd gründet, alli Parteipräsidenta schaffid mit,
nu d SVP bockat, da findid mir nöd grad da Hit.
Drum isch üsi Obervogelpartei sofort bereit, bi üs wörd nöd pennt
und mer schlagid am Volk üsa Koni vor als neua Gemeindspräsident.
Und för sin erste Antrag im Rat bittet er um Ruhe
er will , dass s Rothus dia ganz Fasnacht bleibt zua.

Aktiver Schulhausabwart

„Wäs soll i bloss mache, da isch nöd zum lache.“
So dänkt noch de Ferie e Lehrerin im Schache
Do hät öppert mis Velo gstohle,
söll en doch grad de Tüüfel hole.
De Dieb isch schnäll gfunde und überstellt,
denn da Dieb häts Velo sälber zu de Polizei ufe gstellt.
De Michi Jenny, de Schuelabwart isch de Glon (Clown),
kassiert drum sicher kain Finderlohn.

Wo ist mein Sitzbänkli

I lieb mis Sitzbänkli im Hirschela oba
und wan i eu jetzt verzell, isch wüerkli nöd gloza.
D Gmeindsarbeiter brechid s Bänkli ab insgesamt

agordnet hätts da Roman Gruber vum Bauamt.
Doch ein Tag spöter im Hirschala a da gliche Stell'
bauids s glich Bänkli wieder uf, aber damol ganz schnell.
Doch mir Vögel hönds gmerkt, mer sind doch nöd dumm
mer lachid üs über dia komisch Aktion ganz krumm.
Do gebührt am Roman Gruber nu no Hohn und Spott
wieso das Theater gsi isch, das weiss nu er und Gott.

Parkhaus-Ausfahrt mal anders

I gseh d Olivia Friberg im Migros ganz genau
doch wa macht sie denn do, dia guati Frau?
Sie fährt im Parkhuus a d Schranka aber hinterschi
und da Beifahrer schoppat dänn s Parkbillet in Kasta i.
D Schranka goht uf und sie fährt rückwärts wiiter ganz routiniert
i glob: sie macht da so lang bis da Vater ihre a neus Seitafenster spendiert.

Zeitungen lügen nie

Dass Räbschta prozentual am meista Abfall produziert
lies ich i da Zitig und ha am Problem a kli umastudiert.
Dia Aussag stimmt und i bin zum Ergebnis ko,
viel Müll isch nämli s letzt Johr us üsam Rothus cho.

Grosses Leid im Hause Graber

Am Obed bi Grabers ei Drama und ei Not,
wo de Urs verkündet: „Üsi Katz isch tot.
Uf de Hauptschtross überfahre, es tuet mir weh,
bi mit de Polizei döt gsi und has selber gseh.“

Doch am nögschte Tag isch Katz aber wieder im Hus,
Sie isch nöd vom Tod uferstande und kai Sau chunnt meh drus.
De Gmeindschrieber Urs hät sini eige Katz nöd kännt,
da chunnt de vo, wenn me im Büro so viel pännt.

Tropische Temperaturen im Gemeindetempel

Im Rothus oba laufid nöd nu d Telefon heiss
nei au bi da Gmoandler läuft im Summer da Schweiss
bi über 30 Grad kömmids im Büro gross is Schwitza
roti Köpf, a nassas Hemd und as tropfad us allna Ritza.
5 Grad kühler im Büro, könnt i mer aber au guat vorstella
wenn dia Deppa im Summer wüarid d Heizig abstella.

Transportschaden zweier Männerchörler

Bim Schaffa a da GIREMA sinds in Fahrt und voll im Schuss,
doch dia kli Arbat bringid zwei Männerchörler doch nöd druss.
Mit Salot und Brot hönds an ganze Rollwagä voll biigä,
hönd gmaint bim stossä müends denn au no id kurva ini ligga,
Jo liebä Urs Herrmann und Co-Pilot Jürg Biefer,
da Salot am Bode wörd nüd no riefer
Zrugg i da Progykuchi fangt nomol allas vo vorna a,
und a halb Stund spöter kunnt da Transport komplett im Fäschzelt a.

Ich will schwerer werden

I und min Neujahrsvorsatz, da ischt a spezielli Gschicht'
i ha s letzt Johr nämli nöd ab- sondern zunäh wella a Gwicht
doch da misslingt; i ärgeri mi drum grün und blau
kei Essa bi da Ortsgemeinde und keis bi da Raiffeisen-GV.

Ehe für Alle gilt auch für Obervögel

Söll no öppert bhopte, z Räbschta seg nünt los,
es seg alles so trist und so farblos.
Da isch nöd wohr, jo sogar verloge,
denn i allne Farbe vom Rägeboge,
häts bim Räbschter Mart en Zebrastreife geh,
das hätt ächt kein Räbschter chöne überseh.

Ob Hänn mit Güggel,
oder Güggel mit Güggel,
oder Hänn mit Hänn,
was söll da dänn.

Mör sind offe für d Ehe für alli, da isch au rächt,
usser mit däne vo Marpa, do wirds üs schlächt.

Sie kämpfen für unsere Belzer

I gseh i da Zitiga Bilder vu zwo Demonstationa
und zmitzt inna jeweils grossi Räbschter-Fraktionä.
Sie tönd d Beiza-Schlüssiga vum Bundesrot scharf kritisiera
und stramm durch üsi Gmeind und durch Altstätta marschiera.
A Gruppe vum Bahnhofli isch amana eigna Protest-Marsch gsi.
und als Anführer vu da Linka, isch au üsa Gmeindrot Michi Weber dabi
Und i gseh bi üsam Schwurbler aber grad kei Motivation und kein Reiz
Wär hät denn dä scho amol gseh inara Räbschter-Beiz?

Pele's Velohelme sind top

Mängmol isch s'Läba scho a chli fies
Vor allem bim Hodeschüttler Pele Thurnheer sim Tombola-Priis.

As isch a da Turnerunterhaltig scho a chli gspässig und gspunna
do hät är doch grad sin gspendata Velohelm selber gwunna.

Kinderbetreuung polarisiert

Da Herr Pfarrer geg da Herr Gemeindevorstand
so a Mediaschlacht hätt ma z Räbschta bis hüt nöd kennt
Beidi sind grundsätzlich för d Kinderbetreuig, doch mit anderem Ziel
Da enti sagt, da seg günstig, da anderi as kosti z viel.
Und i ha för beidi Sita d Pünkt ufgschriebe
bis hüt stoht das Spieli unentschieda.

FC Rebstein wird feminin

Sie hönd Erfolg, sind gsellig und guat im Saft.
am FC Räbschta sini neu Fraua-Mannschaft.
Sie sind talentiert, läuferisch top und guat am Ball
aber trotzdem ha i letzthin fasch übercho an Schlaganfall,
wo i ghört ha: «Üsas Damenteam isch lustig und geil
aber 11 Fraua mit am glieche Kleid, da isch doch kein Style».

Schlau muss man sein

Dahom wörd mis Badzimmer saniert, i ka nümme Bada und Duscha,
min Körpergruch tua i sit Wucha nu no mit Parfüm vertuscha.
Doch i ha kurzfristig a Alternative gfunda zum mi Wäscha,
i hock drum i dia schneewies Dorfbadwanne und sauf grad no a Fläscha

Lachen und Applaus tut gut

Isch da schön gsi, d Körnlibank wieder ufsäge vor Publikum

vu luter Freud bstell i glob grad no an Cola-Rum.

Jetzt bruchis nümma, min Psycholog und s Care-Team
dänn an Rückfall wäg da Fasnachts-Abstinenz isch jetzt sehr minim.

Und mer trinkid hüt mit eu drum no a feins Büezer-Bier

Prost uf üsi Fasnacht und uf s usverkauft Schiessipapier.

Räbschter Obervögel 2022